



20. august 2021

UKA 2021/74

Inatsisartut suleriaasianni § 33 tunngavigalugu matumuuna aalajangiiffigisassatut siunnersuuteqarpunga:

Inatsisartut isummerfigisassaattut siunnersuut Naalackersuisut peqquneqassasut meeqqat atuarfiannut tulluussakkamik inuit pisinnaatitaaffii pillugit atuartitsissutissanik kalaallisut ataqatigiissumik sananissamik aammalu taassuma saniatigut suliniutigineqassasoq, meeqqat atuarfianni atuartitsisut inuit pisinnaatitaaffii pillugit ilinniartitsinissamut pikkorissarneqassasut

(Inatsisartunut ilaasortaq Nivi Olsen, Demokraatit)

Tunngavilersuut

Meeqqat aamma inuttut pisinnaatitaaffeqarput. Pingaartuuvoq eqqaamassallugu. Taamatullu pingaartuuvoq, meeqqat pisinnaatitaaffimminnik ilinniartinneqarnissaat, paasitillugit, suna eqqortuunersoq eqqortuunnginnersorluunniit.

Inuit pisinnaatitaaffii nunarsuarmi tamarmi atuupput, Demokraatillu isumaqarput, nammineq allallu pisinnaatitaaffiisa ilisimanissaat pingaaruteqartoq. Ilinniartitsissutigigaanni inunnut allanut assigiinngissuteqartunullu isiginnittariaaseq assigiinngisitaarnerusumik isiginnittariaatsimik pilersitsissaaq, taamaaliornikkullu annertunerusumik paasinnittaaseqarnermik soorlu suiaaqatiminnik atoqateqartartunik aammalu allanik upperisalinnut pilersitsissalluni. Taamaattumik upperilluinnarparput, inuit pisinnaatitaaffiinik ilinniartitsineq allat misigissusaannut paasinninnerunissamut paasinnittumillu pissuseqarnerunermut aqqaassasoq.

“Ilinniartitaaneq aamma inuit pisinnaatitaaffiini atuartitsineq – killiffik Kalaallit Nunaanni 2021” nalunaarusiami taamatuttaaq ersarissumik piumasaaqatigineqarpoq, inuit pisinnaatitaaffiitut ilinniartitsissutinik pilersitsisoqarnissaa.

Inuit pisinnaatitaaffii pillugit atuartitsineq siusissukkut meeqqat atuarfianni aallartinneqartariaqarpoq. Suliniut taanna kalaallisut pitsaasunik ilinniutinik peqartariaqarpoq meeqqallu atuarfianni ilinniartitsisut ilinniartitsinissamut taamaattumut ilinniartinneqarluartariaqarlutik.

Tamanna tunngavigalugu Demokraatit neriuutigaa, siunnersuummut tassunga amerlanerussuteqartunit Naalackersuisuni Inatsisartunilu partiinit taparserneqarumaarlutik.

Pisortanut aningaasatigut allaffissornikkullu kingunissai

Naalackersuisut § 37-apeqqummut normu 40-2021-imut imatut akissuteqarput:

“Nalunarpoq aningaasatigut kingunissaa eqqoriassallugu atuartitsissutissanik nutaanik ineriartortitsinermi, tassani apeqqutaajumaarmat qanoq annertutiginera aamma assilissatigut atortussat eqqarsaatigalugit,



kiisalu atortussat naqqaniik ineriartortinnissaat eqqarsaatigalugu, imaluunniit allagartalersuisoqassanersoq atortussat pioreersut atorlugit.

Assersuutigalugu llinniartitaanermut Pisortaqaarfimmit llinniusiorfik paasissutissiivoq, atuartitsissutissanik 43-nik quppernilinnik ineriartortitsineq akeqassasoq 272.000 kr.-inik. Tassani ilaavoq atuakkiortumut, ilusilersuisumut, grafiker-imut, naqiterivimmut, nutserinermut assigisaannullu aningaasartuutit. Taassuma saniatigut redaktør-ip piffissamik sulinermini atuinissaa.”

Namminersorlutik inuussutissarsiteqartunut aningaasatigut allaffissornikkullu kingunissai

Soqanngilaq

Innuttaasunut aningaasatigut allaffissornikkullu kingunissai

Meeqqat atuarfianni meeqqat pitsaanerusumik inuit pisinnaatitaaffiannut paasinnittaaseqalissapput, aammali namminneerlutik pisinnaatitaaffimminnut eqqummaarinnerulerlutik.